



Inatsisartut

*Aningaasaqarnermut Ataatsimiititaliaq
Finansudvalget*

Ulloq/Dato: 27. oktober 2009
J.nr.: 01.31.06/09-00436

Aningaasaqarnermut Naalakkersuisoq

Suliassaq nr. 01.31.06/09-00436 pillugu sapaammi ulloq 25. oktober 2009 Aningaasaqarnermut Ataatsimiititaliap aalajangernera pillugu Naalakkersuisunut ilisimatitsissut

Suliat arlallit naliliiffigineqaqqinnerinut atatillugu 2009-mi ineqarnermut aningaasaliissutinik tulleriaarineramik allanngortitsinissaq

Naalakkersuisut **inassutigaa**,

- kontumi pingaarnermi 80.00.88-imi, nunaqarfinni isorliunerusunilu sanaartortitsinissanut pilersaarutinut tunngasumi, suliarnut nr. 996.26.105-imut aningaasaliissutit 48,4 mio. kr.-inik ikilineqassasut,
- kontumi pingaarnermi 87.72.13-imi, Immikkut ittumik iluarsartuussinermut tunngasumi, suliarnut nr. 060.97.155-imut, Nuummi Qapiarfiusaarnut tunngasumut, aningaasaliissutit atorunnaarsinneqarlutik 2 mio. kr.-inik ikilinneqassasut aammalu suliaq nr. 060.97.157, Nuummi illunut eriagisanut tunngasoq, pilersinneqarluni Nuummi illunik eriagisanik marlunnik iluarsaassinerit aallartinneqarnissaannut 5,4 mio. kr.-inik aningaasaliisoqassasoq,
- kontumi pingaarnermi 89.71.41-mi, Nukissiorfinnut atatillugu sanaartorfissagissaanermut tunngasumi, suliaq nr. 060.28.029, Qinnorpumi immikkut ittumik sanaartorfissagissaanermut tunngasoq, 14 mio. kr.-inik aningaasaliissutitalerlugu pilersinneqassasoq,
- kontumi pingaarnermi 89.71.12-imi, Taartissanik inissialiortiternermut tunngasumi, suliarnut nr. 070.34.511-imut, aningaasaliissutit atorunnaarsinneqarlutik 1 mio. kr.-inik ikilineqassasut aammalu suliaq nr. 060.34.513, Innarlatalimmi inissianut 96-inut tunngasoq, 29,0 mio. kr.-inik aningaasaliissutitalerlugu pilersinneqassasoq kiisalu suliaq nr. 060.34.514, Nuummi Blok P-p isaterneqarneranut tunngasoq, 3 mio. kr.-inik aningaasaliissutitalerlugu pilersinneqassasoq.

Aningaasaqarnermut Ataatsimiititaliap oqaaseqaatai

Ineqarnermut tunngasuni aningaasaliissutinik pingaarnersiulluni tulleriaarineramik assigiinngitsunik allanngortitsinissanik suliassami matumani Naalakkersuisut qinnuteqarput.

Suliassanut ukununnga aningaasaliissuteqartoqarnissaa qinnutigineqarpoq:

- Piginneqatigiilluni inissiaatileqatigiiffiup Pingorsuaq 1-10-p inissialiortiternissaanut atatillugu Qinnutsinni Nukissiorfiit sanaartorfissagissaanerat.
- Nuummi Blok P-p isaterneqarnissaanik suliniutip aallartinneqarnera.
- Nuummi Innartalimmi inissianik 96-inik sanaartornissamik suliniutip aallartinneqarnera (Inissiat Blok P-mut taartaasussat)
- Nuummi sanaartukkat eriagisassatut nalilerneqarsimasut B-29-p (Naalakkersuisut

Siulittaasuata illua) aamma B-75-ip iluarsaanneqarneri.

Suliassanut ukununga aningaasaliissutinit nuussisoqarnissaa qinnutigineqarpoq:

- Nuummi Qapiarfusaami sanaartukkanik iluarsaassinisaaq. Suliniut taamaatiinneqassaaq isaterinermillu, akikinnerusussatut nalilerneqartumit, taarserneqarluni.
- Nunaqarfinni isorliunerusunili sanaartortitsinissamut pilersaarutit.
- Maniitsumi piginneqatigiilluni inissialiortitsinissamik suliniut, soqutigineqannginnera pissutigalugu unitsiinneqartoq.

Ulloq 25. oktober 2009 Aningaasaqarnermut Ataatsimiititaliaq qinnuteqaat pillugu Ineqarnermut, Attaveqarnermut Angallannernullu Naalakkersuisumik isumasioqateqarpoq.

Isumasioqatigiinnermi Aningaasaqarnermut Ataatsimiititaliaq ataani atuarneqarsinnaasunik apeqquteqarpoq. Apeqqutinut Naalakkersuisunut ilaasortap akissutai apeqqutigineqartup ataanut ilanngunneqarput.

Isumasioqatigiilluni ataatsimiinnermi akineqartussatut Aningaasaqarnermut Ataatsimiititaliap apeqqutaa:

- a. Qinnuteqaammut ilanngussaaq 1-imi Nuummi ilinniartunut inissiat taaneqarput. Blok P-mik isaterinermut atatillugu aqqissuussinissatut eqqarsaatigineqartup nassatarisaanik ineqarnermut akiliutip Illuut A/S-imut akilerneqartup aamma KAF-ip ilinniartunut akilertissinnaasaasa assigiinngissutaat matussuserniarlugu KAF aningaasaliiffigeqqinneqartariaqassasoq allaqqavoq. Tamatumani aningaasartuutaasussatut naatsorsuutigineqartut erseqqinnerusumik nassuiaatigineqarnissaat kissaatigineqarpoq. Tassunga atatillugu ersarinnerusumik ilusiliinissamut periarfissat nassuiaatigineqassasut kissaatigineqarpoq.

AKISSUT: Apeqqut ataasiinnarmik paasineqarsinnaasumik akineqarsinnaanngilaq, pissutigalugu ilinniartunut inissiat pitsaassutsimikkut periarfissatigullu assigiinngitsuusussaammata. Inissiat 42-it taakkua marlunnik initaliullutik aamma pingasunik initaliullutik akuleriissinneqassapput. Taamaalillutik taakkua aappariinnut aammalu aappariinnut meerartalinnut naleqquttuussapput. Pisuni taakkunani inissiat ilinniartunut inissiatut "nalinginnaasutut" attartortinneqarsinnaassapput, taakkualu attartortut allat assigalugit maleruagassat atuuttut malillugit ineqarnermut tapiissuteqarfigineqarsinnaassapput. Taamaalilluni KAF inissianut aningaasartuuteqassanngilaq. Ullumikkut KAF, A/S Inissiaatileqatigiiffik INI-mit inissianik 30-init amerlanerusunik attartugaqarpoq. Ilinniartunut inissiat nutaat taakku ilai taakkununga taarsiisinnaassapput. Tamanna annertunerpaatigut aningaasartuuteqarfiussanngilaq. Pisumi assersuutigalugu inissiamik marlunnik initalimmik Illuut A/S-imit KAF attartorpat, assersuutigalugu 3.350 kr.-inut, aammalu taanna 1.750 kr.-inut attartortillugu, matussuserneqanngitsoq qaammammut 1.600 kr.-iussaaq, ukiumut 19.200 kr.-iussalluni. Inissianut 42-inut tamanut taanna atuussimappat – inissiat angissusiannut iluarsillugu – tamanna ukiumut 890.000 kr.-ingajannik naleqassaaq.

Aningaasaqarnermut Ataatsimiititaliap ukiumut aningaasartuut taanna tusaannarlugu annertuutut nalilerpaa. Isumasioqatigiinnermi Naalakkersuisunut ilaasortap tapiliullugu ilisimatitsissutigaa, aamma imatut aqqissuussisoqarsinnaasooq ilinniartut, ilinniartut ineqarfianni najugallit, nalinginnaasumik aningaasartuutit tunngavigalugit ineqarnermut

akiliisinneqartarsinnaallutik, illuatungaatigut ineqarnermut akiliummut tapiiffigineqartarnermik aaqqissuussineq aqputigalugu matussuserneqartussanik. Aningaasaqarnermut Ataatsimiititaliap taamatut aaqqissuussisinnaaneq tusaannarlugu paasiuminarnerutippaa.

Isumasioqatigiilluni ataatsimiinnermi akineqartussatut Aningaasaqarnermut Ataatsimiititaliap apeqqutaa:

- b. Blok P-mik isaterinissamik pilersaarut qinnuteqaammut ilanngussaq 1-imi taaneqarpoq. Inissiarsuup sisamanut tallimanulluunniit immikkoortillugu isaterneqarsinnaanissaa “naatsorsutigineqartoq” allassimavoq. Tassunga atatillugu misissuinerit suut ingerlanneqarsimappat inissiarsuarlu immikkoortunut arlalinnut immikkoortillugu naatsorsuutigisatut isaterneqarsinnaanngitsoq paasinarsippat Naalakkersuisut qanoq iliussappat?

AKISSUT: Titartaasarfik TNT isaterinissamut pilersaarummut oqaaseqaateqarnissamut piumaffigineqarpoq. TNT-p kommune taamatullu Nukissiorfiit attaveqarfigai. Saaffiginnissutit taakkua tunngavigalugit Blok P sisamaniit tallimanut aggulullugu isaterneqarsinnaasoq annertuumik ilimanaateqarpoq. Taamaattorli tamatumani pilersuinerimut aqqusersuutunik arlalinnik allanngortiterinissaq pisariaqartussaavoq. Tamatumunnga aningaasaliissuteqartoqarniariapat misissuinerit sukumiinerusut ingerlanneqartussaapput. Kisiannili Blok P minnerpaamik pingasunik aggulullugu isaterneqarsinnaasoq qularnangilaq, tamannalu Naalakkersuisut pilersaarumminnik naammassinninnissaannut naammappoq.

Isumasioqatigiilluni ataatsimiinnermi akineqartussatut Aningaasaqarnermut Ataatsimiititaliap apeqqutaa:

- c. Nuummi Qapiarfusaamut tunngatillugu pilersaarut qinnuteqaammi ilanngussaq 1-imi taaneqarpoq. Naatsorsuutigineqaaqqartut kvadratmeterimut 13.560 kr.-inik akeqarnani iluarsaanissaq kvadratmeterimut minnerpaamik 18.900 kr.-inik akeqartussatut maanna naatsorsuutigineqartoq allassimavoq. Danmarkimi piserussuseqarnerup apparitornera aammalu sanaartornermi atortut akiisa apparierat pissutigalugit sanaartornermi akit ataatsimut isigalugu appariaateqartussatut naatsorsuutigineqartut Naalakkersuisut allamut atatillugu paasissutissiisutigaluarpaat. Tamanna qanoq paasisariaqarpa, tamatumalu saniatigut akitsoriaat pillugu Naalakkersuisut qanoq paasissutissiisinnaappat?

AKISSUT: 2009-imi aasaanerani/ukiaanerani inissiani arlalinni aserorterilluni misissuinerit (illunik isaterilluni) ingerlanneqarput. Paasineqarpoq uffarfiit oqitsut taamanikkut inissiarsuit sananeqarmata nalinginnaasuusut atorlugit ilusilersuisimaneq naatsorsuutigineqartumit naatsorsorneqartumillu annertunermik erngup oquullu ajoqusiinerinik malitseqarsimasoq. Taamaalilluni iluarsaassinerimut atatillugu inissiap atornerarnerani pitsaanerulersitsinngitsumik, taamaallaalli ajoqusiinerit peerneqarnissaannut tunngasumik annertunermik suliaqarnissaq pisariaqalersimavoq. Nutaamik sanaartornerup taamaallaat sanaartukkamut nutaamut akiliiviusartup akerlianik, iluarsaassinerimut pisoqqat piarnerannut aammalu nutaamik sanaartornerimut akiliisoqartussaavoq. Pisoqqami qanoq

annertutigisoq atoqqinneqarsinnaanersoq sioqqutsisumik ilisimaneqarneq ajormat, suliariumannittussarsiuussinerup inerneru amerlanertigut qaffasissumiittarput, pissutigalugu suliarinnittussat neqerooruteqarnerminni sillimmatissaminnik ilanngussillutik qularnaarisariaqartarmata.

Isumasioqatigiilluni ataatsimiinnermi akineqartussatut Aningaasaqarnermut Ataatsimiititaliap apeqputaa:

- d. Tamatumunnga sanilliullugu Nuummi SANA-p eqqaani inissarsuit immikkoortukkuutaat sananeqarnerat qanoq akeqarpa?

AKISSUT: Nuummi Dronning Ingridip Napparsimavissuata eqqaani inissianik 90-inik sanaartornermi Tuapannguani sanaartornermi pilersaarut atoqqinneqarpoq. Kisiannili marulluk toqqavimmik sisoortitsisoq pissutaalluni sanaartorfiup toqqavia pitsaavallaarsimangilaq aammalu toqqavissami immikkut suliaqarnissaq pisariaqarsimalluni. Taamaakkaluartoq ataatsimut katillugu inaarutaasumik akia, suut tamaasa ilanngullugit, tassalu sanasunut, siunnersortinut, ingeniørinut, nakkutilliinermut, sanaartornermi ernianut, siumut naatsorsuineq il.il., 139 mio. kr.-init inorlugit, kvadratmeterimut 17.800 kr.-it missaasa annertoqqataannik, annertussuseqassasoq naatsorsuutigineqarpoq.

Taakku saniatigut Aningaasaqarnermut Ataatsimiititaliap Illuut A/S pillugu allaaserinniffiusumik allakkiamik noqqaasimavoq. Ataatsimiititaliap taama allakkiortoqarnissaa kissaatigisimavaa Naalakkersuisut sanaartugassanut pilersaarutaanni Illuut A/S-ip inissisimanagera paasisaqarfigineqarsinnaaniassammat. Allakkiaq tunngavigalugu Ataatsimiititaliap paasivaa pilersaarutini taakkunani Illuut A/S qitiusumik inissisimasoq. Allakkiaq tunngavigalugu ingerlatseqatigiiffiup pingaartumik aningaasalersuineri sakkutut atorneqarnissaa siunertaavoq. Taamaalilluni ingerlatseqatigiiffik inissianik allanillu sanaartornissat aningaasalersorneqarnissaat siunertaralugu pigisanik aalaakkaasunik qularnaveeqqusiussilluni taarsigassarsisartussaassaaq. Taamaaliornikkut siunertaavoq suliniutit assigiinngitsut eqqarsaatigalugit aningaasartuutininut tamarmiusunut nunatta karsiata akiliuteqartannginnissaa.

Illuut A/S ilaatigut naatsorsuutigineqarpoq Nuummi Blok P-p Qapiarfiusaamilu sanaartukkat isaterneqarnissaannut aningaasanik pissarsiniarnermut atatillugu atorneqarumaartoq. Ingerlatseqatigiiffilli suli pilersinneqanngilaq.

Suliassami matumani Aningaasaqarnermut Ataatsimiititaliap amerlanerussuteqartunut ikinnerussuteqartunullu avissimavoq.

Aningaaqarnermut Ataatsimiititaliami ikinnerussuteqartut, Siumup Atassutillu sinniisaasa, Naalakkersuisut inassuteqaataat **akuerisinnaanngilaat**. Partiit taakku marluk sinniisaasa erseqqissarumavaat, soorunami akerliunnginnamik suliniutinut inissianik amerlanerik pilersitsinerik kinguneqartussanut, minnerunngitsumik akissaatikinnerit akilersinnaasaannik inissianik neqerooruteqarsinnaanerup qularnaarneqarnissaa eqqarsaatigalugu. Taamaattorli ingerlatseqatigiiffik Illuut A/S eqqarsaatigalugu aqqissuussaaneq suli nalorninartortaqarpoq, qularnaatsumillu oqaatigineqarsinnaanani taamatut aqqissuussineq ilumut inatsisiliornernut

naapertuunnersoq. Tamatuma saniatigut sanaartornermi suliassat annertooujussuit ingerlatseqatigiiffimmut suliluunniit pilersinneqanngitsumut akisussaaffigisassanngortissallugit illersorneqarsinnaanngitsunut isigineqarpoq.

Atassutip sinniisaata tamatuma saniatigut immikkut pingaartippaa aaqqissuussinerup inatsisitigut naapertuuttuunera suli pitsaaneruseqarpoq uppersaaseqqaarneqartariaqartoq Naalakkersuisut inassuteqaataat akuersissutigineqarsinnaassappat.

Aningaasaqarnermut Ataatsimiititaliami amerlanerussuteqartut, Inuit Ataqatigiit Demokraatillu sinniisaasa, Naalakkersuisut inassuteqaataat **akuerisinnaavaat**. Amerlanerussuteqartut akuersinermittut erseqqissumik **aallaavigaat**, Naalakkersuisut naapertuuttumik isumannaatsumik qulaajarlugulu qularnaarsimassagaat Illuut A/S eqqarsaatigalugu aaqqissuussineq inatsisinut naapertuutiinnarani aamma aningaasaqarniarnikkut pissusissamisuussasoq, taamaaliornikkut Nunatta Karsiata naatsorsuutiginnngisamik annaasaqariataarsinnaanera pinngitsoortinniarlugulu.

Amerlanerussuteqartut inassuteqaataat naapertorlugulu aalajangiisoqarpoq.

Aningaasaqarnermut Ataatsimiititaliap aalajangiinera

Aningaasaqarnermut Ataatsimiititaliami amerlanerussuteqartut Naalakkersuisut inassuteqaataat **akueraat**.

Aningaasaqarnermut Ataatsimiititaliap sinnerlugulu

Naaja Nathanielsen
Aningaasaqarnermut Ataatsimiititaliap Siulittaasua